

卷一

皇明同姓諸王傳第三卷 吾學編第十六

海鹽鄭曉

虞王

虞王雄英懿文太子長子洪武十五年五月己酉朔卒追封虞王謚懷葬鍾山令侍臣素服步送

吳王

吳王允燭建文君弟懿文太子第三子洪武十年十一月生三十一年封杭州未之國建文四年七月靖難後降封廣澤王居福建漳州是年九月召還京以不能諫正建文君降庶人永樂十三年卒

同姓諸王傳 卷三  
英宗復辟出吳庶人居鳳陽者但有庶母姊姪老婦五六人時年八十矣

衡王

衡王允燧洪武三十一年封未之國建文四年七月降封懷恩王居江西建昌是年同吳王召還京廢爲庶人

徐王

徐王允熯洪武二十四年六月生生八年而封未之國建文四年七月降封敷惠王隨母呂太后居太子陵永樂二年改封甌寧王奉太子祀未遣之

簡  
國四年二月邸中忽火起驚仆地卒年十六謚哀

建文君太子

太子文奎洪武二十九年十月晦生 上曰十月晦月日皆終不喜三十一年建文君卽位立爲皇太子靖難兵入京年七歲矣莫知所終

建文君少子

少子文圭建文三年生生二歲建文君遜位靖難後號爲建庶人者是也幽中都廣安宮 英宗復辟憐庶人無罪久繫禁欲寬庶人李賢贊曰堯舜

心也請於 太后出於鳳陽歲給薪米聽婚娶出入自便又與閹者二十人婢妾十餘人給使令遣奄牛玉入禁諭庶人庶人伏地頓首謝且喜且悲有阻議者 上曰有天命者任自爲之庶人入禁時纔二歲年五十六七始出鳳陽不識牛馬世傳成祖入宮時建文君有幼子老媪教之牽 成祖衣哭跪前求食曰孩兒餓矣饑殺孩兒矣 成祖亦哭曰汝生帝王家寧有餓死理命善撫之不知此建文君第幾子抑卽太子少子也或曰牽衣哭者 成祖育諸宮中未詳

漢庶人

漢庶人高煦 成祖第二子初 太祖召秦晉燕周四世子及庶人輩學於京師顧不肯學日遊嬉輕躁無行建文卽位初 仁宗及庶人奔喪京師舅氏魏國公徐輝祖密戒之不聽盜輝祖馬不朝辭渡江走歸途中輒殺民吏至涿州又殺驛丞其凶橫淫荒狡黠險狠跋扈不可御久矣靖難兵起仁宗居守庶人有膂力善騎射從行頗有功江上之戰靖難兵稍却庶人適引胡兵至戰勝已而議建儲藩府舊臣淇國公丘福駙馬王寧善庶人時

時稱二殿下功高。成祖曰：居守功高於扈從儲貳，分定於適長。且元子仁賢真社稷主，汝等勿復妄言。永樂二年，立東宮，封庶人漢王。國雲南，快快不肯去，曰：我何罪？斥我萬里，改青州，又快快不肯去，曰：我何罪？置我瘠土，留京師，又請得天策衛為護衛。曰：唐太宗天策上將，吾得之豈偶然？又益請兩護衛。曰：我英武，豈不類秦王？成祖狩北平，庶人益不法，陰蓄壯士，肆出盜劫兵馬，指揮徐野驢擒之。庶人怒，手鐵爪撾殺徐，指揮眾莫敢言。遂僭用天子車服。十四年，成祖巡北京，聞不豫，逆謀

益著。成祖聞之，怒，促駕南還，召庶人，褫冠衣，囚繫西禁門，條其罪惡數十事，且誅之。仁宗頓首伏地，涕泣力救，久之，削兩護衛，誅其左右狎暱徒。封樂安州，促即日行。成祖顧謂東宮及太孫曰：樂安近北京，即聞變，朝發可夕擒。至樂安，怨望異謀，益急。東宮數書戒，竟不悛。成祖北征，晏駕，庶人子瞻圻在北京，凡朝廷事，潛遣人馳報。一晝夜六七行。庶人日亦數十遣人入潛，伺京師幸有變，仁宗固知之。顧益厚遇，書召至，倍加歲祿，賜資萬計。先是瞻圻憾父殺其母，屢發父過惡。成祖曰：

尔父子何忍也至是庶人悉上瞻圻前後覘報中朝事又曰廷議旦夕發兵取樂安 仁宗召示瞻圻曰汝處父子兄弟間讒構至此稗子不足誅遣鳳陽守皇陵二十二年十月封庶人嫡子瞻坦爲漢世子次瞻空濟陽王瞻域臨淄王瞻埤昌樂王瞻堦淄川王瞻坪齊東王瞻埽任城王瞻塢海豐王瞻邨新泰王未幾 仁宗大漸 宣宗自南京奔喪卽位賜二叔視他府特厚庶人日有請及言朝政 上曲徇其意索駝與之駝四十索馬與之馬百二十索袍服又與之袍服庶人益自疑宣德

元年八月壬戌朔遂反遣枚青潛來京約英國公張輔內應輔暮夜繫青聞於朝又約山東都指揮靳榮等反濟南爲應又散弓刀旗令真定諸衛所盡奪傍郡縣畜馬立五軍都督府指揮王斌領前軍韋達左軍千戶盛堅右軍知州朱恒後軍諸子各監一軍庶人率中軍世子瞻垣居守指揮韋弘韋興千戶王玉李智領四哨部署已定僞授王斌朱恒等太師都督尚書等官御史李濟樂安人棄其家變姓名間道詣京上變言庶人刻日取濟南然後率兵犯闕陞濟行在左僉都御史遣中官侯

泰賜書庶人言昨枚青來言叔督過朝廷予不信  
皇考至親惟二叔予所賴亦惟二叔小人離間不  
得不敷露中懇且傳播驚疑或有乘間竊發者不  
得不略爲之備惟叔鑒之泰至樂安庶人盛兵見  
泰傲倨不拜勅南面坐跪泰大言曰永樂中信讒  
削我護衛徒我樂安 仁宗徒以金帛弭我今又  
輒云 祖宗舊制殊令我鬱鬱豈能久居此汝試  
觀我士馬豈不橫行天下汝歸報急縛奸臣來徐  
議吾所欲泰懼唯唯還 上問庶人何言對無所  
言又問庶人治兵何如對無所見 上曰泰二心

已而錦衣官從泰往者具陳所見 上大怒泰是  
月丁卯庶人遣百戶陳剛進疏言 仁宗違洪武  
永樂舊制與文臣誥勅封贈今修理南巡席殿等  
事爲朝廷過斥二三大臣夏原吉等爲奸佞並索  
誅之又書與公侯大臣驕言巧詆污蔑乘輿 上  
歎曰庶人果反立召張輔諭親征輔對曰庶人素  
怯懦今所擁非有謀能戰者願假臣兵二萬擒獻  
闕下 上曰卿誠足擒賊顧朕新卽位小人或懷  
二心行決矣令大索樂安奸謀乙丑勅遣指揮黃  
謙同總兵平江伯陳瑄防守淮安勿令賊南走令

指揮芮勛守居庸關令法司盡弛軍旗刑徒從征  
戊辰命定國公徐景昌彭城伯張昶守皇城安鄉  
伯張安廣寧伯劉瑞圻城伯趙榮建平伯高遠守  
城已巳命豐城伯李賢侍郎郭璉郭敦李昶督軍  
餉命鄭王瞻垓襄王瞻塏留守北京廣平侯袁容  
武安侯鄭亨都督張昇山雲尚書黃淮黃福李友  
直協守輔少師蹇義少傅楊士奇少保夏原吉太  
子少傅楊榮太子少保吳中尚書胡濙張本通政  
使顧佐扈行陽武侯薛祿爲先鋒辛未發京師癸  
酉過楊村馬上顧問從臣曰試度庶人計安出或

對曰樂安城小彼必先取濟南爲巢窟或對曰彼  
曩不肯離南京今必引兵南去 上曰不然濟南  
雖近未易攻聞大軍至亦不暇攻護軍家在樂安  
不肯棄此去南京庶人外多誇詐內實懦怯臨事  
狐疑展轉不能斷今敢反輕朕少年新立衆心未  
附又謂朕不能親征即遣將來得以其言厚利誘  
餌幸成事今聞朕行已膽落敢出戰乎至即擒矣  
戊寅獲樂安歸正人益知賊中虛實言賊初約斬  
榮取濟南山東布按二司官覺之防榮不得發又  
聞大軍至不敢出朱恒應天人力言宜引精兵趨

南京得南京大事成矣衆不從曰尔顧得赴家奈我輩何又曰庶人初聞陽武侯等將兵攘臂喜曰此易與及聞親征始懼於是授歸正人官厚賞給榜令還樂安諭衆 上仍書諭庶人曰張敖失國本之貫高淮南受誅成於伍被今六師壓境王即擒獻倡謀者朕與王除過恩禮如初不然一戰成擒或以王爲奇貨縛來獻悔無及矣 上英暢神武詞旨明壯我師氣盛龍旗鉦鼓千里不絕庚辰祿馳奏前鋒至樂安庶人約明日出戰 上令大軍蓐食兼行文大臣請慎重武大臣曰林莽間或

設伏百里趨利不可 上曰兵貴神速我抵城下營彼阱中虎爪牙安施大軍至烏合之衆方洶洶何暇設伏遂行夜分至陽信時慶雲陽信吏人皆入樂安城無一來朝者辛巳昧爽駐蹕樂安城北城中黑氣黯黯我兵壁其四門賊乘城舉砲我軍發神機銃箭聲震如雷城中股慄諸將請即攻城上不許勅諭庶人再遣勅皆不答圍中人多欲執獻庶人者庶人密遣人詣行幄願假今夕訣妻子明日出歸罪 上許之是夜庶人盡焚兵器及通逆謀書壬午移蹕樂安城南庶人將出城王斌等

力止曰寧一戰死無爲人擒庶人給斌等復入宮  
遂潛從間道出見 上羣臣請正典刑不允以劾  
章示庶人頓首言臣罪萬萬死惟陛下命 上令  
庶人爲書召諸子同歸京師赦城中罪止同謀勝  
從者不問遂執王斌等下行錦衣獄癸未令祿尚  
書張本鎮撫樂安改樂安爲武定八月乙酉班師  
命中官頌繫庶人父子赴北京錦衣械繫王斌朱  
恒盛堅典仗侯海長史錢異教授錢常至京皆伏  
誅惟長史李默以嘗諫免死謫口北爲民誅榮榮  
子義天津鎮守都督孫勝山西都指揮張傑楊雲  
青州左衛指揮使 誠滄洲衛指揮鄭典皆約舉  
城應者先納軍馬糧仗數事覺相繼誅六百四十  
餘人其故縱與藏匿坐死戍邊者一千五百餘人  
編邊氓者七百二十人初庶人被執鎖繫逍遙城  
一日 上欲往視左右止之不聽及至熟視久之  
庶人出不意伸一足勾 上仆地左右急扶起亟  
命壯士舁銅缸覆之缸約重三百斤庶人有力頂  
負之輒動積炭缸上如山燃炭逾時火熾銅鎔庶  
人死諸子並死

趙王

四皇子

趙王高燧 成祖第三子永樂元年封彰德洪熙  
元年就國王負靖難功密與漢庶人謀奪嫡時時  
譖東宮傷其官寮繫獄多死者永樂二年居守北  
京信用邪說恣行不法七年 上聞之大怒誅其  
長史顧晟褫王衣冠 東宮力解得免擇國子司  
業趙亨道董子莊爲長史二人能輔導王稍稍改  
行二十一年五月 上不懌護衛指揮孟賢等結  
曆官王射成及內侍養子造僞詔俟晏駕詔從中  
下立趙王總旗王瑜有姻家高以正者爲賢等畫  
此謀謀定告瑜瑜上變告 上曰豈應有此立捕

賢得所造詔誅賢射成以正及內侍諸養子陞瑜  
遼海衛千戶王大懼又稍稍斂戢 仁宗即位加  
漢趙二王祿歲二萬石通前三萬石封王長子瞻  
坂爲趙世子次瞻塙爲安陽王 宣宗初即位賜  
田園八十頃漢庶人反誅班師至單橋陳山迎駕  
遂言曰趙王與漢庶人逆謀久矣今宜藉此兵威  
移指彰德擒趙王否趙亦反側不自安異日復勞  
聖慮 上不聽楊士奇亦以爲不可山又詣尚書  
蹇義夏原吉言方略邀二人共請 上意不忍曰  
先帝愛二弟漢王自絕於天朕不敢赦趙王反形

未著朕終不忍負先帝也高煦至京又言嘗遣駱  
指揮阮內使與趙通謀 上以漢庶人詞羣臣章  
遣廣平侯持示王王大懼上還常山中護衛及羣  
牧所儀衛司官軍校 上與儀衛司是年瞻坂卒  
年十七謚悼僖王在位二十九年宣德六年卒謚  
簡瞻塙宣德七年以安陽王嗣王卒謚惠子祈鑑  
嗣卒謚悼子見灑嗣卒謚靖子祐採嗣卒謚莊子  
厚煜嗣四皇子未封卒

鄭王

鄭王瞻堉 仁宗仲子母李 妃永樂二十二年

封漢庶人反王與襄王居守宣德四年之國鳳翔  
王請安王竹園韓王以安王舊邸得竹園 上曰  
園在鳳翔去平涼遠與鄭王便正統八年乞徙徙  
懷慶留京邸明年之國成化二年卒謚靖子祁鏊  
成化四年嗣乞河壩地弘治八年卒謚簡世子見  
滋卒以子祐杓封世子弘治十年嗣王贈父鄭僖  
王祐杓正德二年卒謚康無子見滋弟東垣端惠  
王見漬以子祐擇正德四年嗣王贈鄭定王祐擇  
十六年卒謚懿子厚烷嘉靖六年嗣車駕南巡王  
來迓賜幣物加祿歲三百石

同姓諸王傳 卷三  
十一  
斬王

斬王瞻垠永樂十九年卒贈斬王謚獻葬京師西山

越王

越王瞻墉未之國 宣宗賜昌平縣莊田四十頃  
卒謚靖妃吳氏謚貞惠葬京師西山無子國除已  
巳之變虜入王墳廬掠祭器去

襄王

襄王瞻塿母 昭皇后永樂二十二年封未之國  
上崩監國漢庶人反留守宣德四年之國長沙王

統元年遷襄陽七年來朝景泰三年乞得山地百  
頃奪門時石亨等欲殺于謙王文謂謙等通奄王  
誠盜金符迎王 英宗因詔王來朝相見甚歡宴  
便殿王避席請曰臣過汴汴父老遮道言按察使  
王槩賢誣下詔獄臣途中詢槩人咸謂槩冤願

皇上加察 上立命法司雪槩王辭歸 上送至

午門王伏地不起 土曰叔父欲何言王頓首曰

萬方望治如飢渴願 皇上省刑薄斂 上拱手

謝曰敬受教四年又來朝 上為峴山漢水賦襄

陽四景歌賜王成化十四年卒年七十二謚憲長

子祁鏞正統八年封世子成化十五年嗣弘治元年卒謚定定王三子長見淑成化十六年封世子弘治二年嗣明年卒謚簡簡王二子祐材弘治三年封世子明年嗣與興邸爭地灘逮七十二家獄久不決大理卿汪綸兩解得已十七年卒謚懷無子弟祐欝弘治四年封光化王正德中嗣王嘉靖四年卒謚棗陽王者名祐惲嘉靖初上疏乞尊崇本生考妣為帝后入廟祀又上言乞許宗人執業為士農得自贍免飢寒無煩朝廷歲祿下禮部議不許

荆王

荆王瞻垆母張順妃永樂四年生二十二年封宣德四年之國建昌乞南城縣司獄又乞近閑田正統四年改蘄州景泰元年十二月上疏請朝上皇不許四年卒謚憲二子長祁鎬正統八年封世子景泰六年嗣天順五年卒謚靖靖王三子長見瀟天順中嗣弘治五年坐不法命太監蕭敬駙馬都尉蔡震都御史戴珊召王至并其長子祐柄降庶人遷置武昌見瀟弟見溥成化二年封都梁王十三年卒謚悼惠其妃何氏賜自盡子祐欄弘治

同姓諸王傳 卷三  
七年以都梁王進封荆王十七年卒謚和和王二子長厚烜弘治十六年封世子正德二年嗣嘉靖中病辭祿不允王二子長戴盛嘉靖九年封永定王永定王一子

淮王

淮王瞻塿母李賢妃永樂二十二年封宣德四年之國韶州開府府治正統元年遷饒州十一年卒謚靖子祁銓正統十三年嗣卒謚康世子見濂早卒見濂弟清江王見澱以子祐祭嗣贈淮端王祐祭弘治十八年嗣王嘉靖二年卒謚定無子弟鎮

國將軍祐揆嘉靖四年嗣王十六年卒謚莊子厚壽嘉靖八年封世子十七年嗣

滕王

滕王瞻塿母郭貴妃永樂二十二年十月封宣德改元卒年十七謚懷葬京師西山無子國除其長史姚友直事王王喜其恭謹 宣宗愛王爲陞友直雲南左叅議掌長史司事

梁王

梁王瞻塿母恭肅郭貴妃永樂二十二年封即郢邸開府宣德四年之國承奉孔勤侮詈王 上曰

梁王朕親弟奴敢如是逮勤王又爲解 上曰羣  
奴惕王耳竟誅勤未幾上表不恭有司請治長史  
上以王故特不問襄獻王自長沙徙襄陽過安陸  
王出迎明日獻王入城相見歡甚又明日辭去王  
泣曰嗟乎吾兄弟不得更復相見奈何正統元年  
上言府卑濕乞更爽塏地 上曰郢中歲屢歉俟  
有秋理之竟不果徙六年卒謚莊葬安陸妃紀氏  
繼魏氏無子國除景泰二年魏妃卒妾張生女二  
皆封郡主封張王夫人掌王宮事成化十六年亦  
卒梁故盡得郢田宅園湖後皆賜襄王 睿宗封

安陸得梁郢邸田供二王祀事

衛王

衛王瞻誕未之國 仁宗簡舊宮臣司直金寔爲  
王左長史宣德初凡郊社陵廟禮每命王攝事正  
統三年卒謚恭妃楊氏謚貞烈無子國除

許王

許王見淳 英宗子母王惠妃王生時 英宗北  
狩未還景泰廢太子封沂王也并封沂王弟見清  
榮王見淳許王景泰三年十一月許王卒於京師  
禮部請喪用親王禮內批王幼殺其禮謚悼葬西

山

德王

德王見潏天順元年三月六日復東宮是日立德  
秀崇吉四王歲祿各本色萬石德王初封德州改  
濟南成化二年就國二十一年請業南旺湖以漕  
渠故不許正德十三年卒謚莊子祐榕正德十六  
年嗣嘉靖十九年卒謚懿子厚燉十二年封世子  
卒謚懷順世子載塔十九年嗣贈厚燉德懷王景  
泰元年五月丁未正使都督張軌副使太子太保  
吏部尚書何文淵持節封裕陵第二子見清爲榮

王或曰卽德王也又有三皇子未封卒

秀王

秀王見澍母高淑妃景泰三年生王於南城成化  
三年封國汝寧左長史劉誠獻王千秋日鑒錄王  
大喜之國時淹於途民以爲擾左長史爲言王輒  
急行抵國宦豎言王居隘請移先師廟廣王居王  
不聽一日兩長史講書西伯戡黎左長史主吳氏  
說曰戡黎者武王也右長史趙銳主孔氏說曰文  
王寔戡黎兩長史辯大爭王徐曰先皇簡二先生  
輔余經義卽未有定論何嫌徃復乃爾動色兩長

史皆頓首謝王卒謚懷葬京師西山妃黃氏無子  
國絕王有宮人陳氏召還京成化中特封爲夫人

### 崇王

崇王見澤天順元年封成化十年之國汝寧弘治  
八年 孝肅太后思見王 上勅召王朝禮官倪  
岳言二年間三王之國郡縣供需兵民皆困崇王  
復來往返勞費何以堪兼水溢旱蝗舟車所經恐  
有他虞親王來朝雖有故事然自洪熙宣德以來  
已鮮舉行 英宗復辟襄王奉詔來朝雖篤敦叙  
之恩實塞疑讒之隙宜勿召王便初 上不允岳

言已而中止十八年卒謚簡簡王四子長祐案弘  
治中嗣正德六年謚靖靖王四子長厚燿正德九  
年嗣嘉靖十六年卒謚恭長子載境八年封世子  
十七年嗣乞修府下巡撫議費銀八萬七千兩工  
部言親王修府例役護儀牧人不得輒勞民 上  
不允十九年王請父恭王墓表禮部言韓府襄陵  
莊穆王卒 憲宗嘗允其子範址請令詞臣撰銘  
刻石崇王曾祖皆嘗賜墓表請如王奏 上若曰  
宗室薨逝給壙誌此 祖宗典制安得有賜表事  
襄陵王立石已非例崇兩王表墓皆先朝誤恩後

有王家乞請禮部宜考累朝體例議覆

忻王

忻王見治母宸妃天順二年生生九歲而封封七年未之國卒謚穆葬京師西山

吉王

吉王見浚國長沙陳友諒初據長沙友諒誅長沙稅畝特重民流移多荒棄王因請得賜名鷄鵝食田十三萬畝徵租尤重嘉靖初令減十五嘉靖六年卒謚簡一子祐扶弘治四年封常山王正德四年進封吉世子五年卒謚悼莊二子長厚煇正德

十四年封吉世孫嘉靖八年嗣王十年贈父吉悼王明年乞長沙府湘潭商稅邸租不許卒謚定二子長載均嘉靖十五年封光化王十九年嗣王

徽王

徽王見成化十七年之國鈞州歲祿本色萬石妃黃氏與秀王妃兄弟也弘治二年乞陞州爲府吏部尚書王恕言肅藩荆岷皆封州鈞不得獨陞府從之王卒謚莊子祐檯正德三年以興化王進世子嗣嘉靖四年卒謚簡子厚燭嘉靖五年以安邑王進世子嗣厚燭父子繼請陞鈞州爲府朝議

不許嘉靖中車駕南巡王迓送恭加祿歲三百石  
侑金幣

### 懷獻太子

懷獻太子見濟 景帝長子母杭妃景泰三年四  
月思明土酋黃玠者初以功授丘溫衛指揮歷陞  
廣西都指揮使守備潯州思明土知府瑠庶兄也  
瑠老子鈞襲知府玠欲殺鈞奪知府與其子矯軍  
門令徵兵思明令其子糾諸心腹驍悍數千人去  
府城三十里結寨夜馳破府城滅瑠家支解瑠父  
子納甕中瘞後圍即引衆還寨明日報至佯不知

驚哭仆地走思明發喪尋瑠父子屍不得又慟哭  
仆地揮淚遣人告玠急捕賊復此家門大讐方玠  
子殺瑠時瑠有僕福童見玠子并識其左右人脫  
走憲司訴玠父子殺瑠父子狀郡中人亦皆知賊  
本玠父子也左副總兵武毅疏聞于朝玠大懼謀  
於侍郎江淵令遣千戶袁洪走京師上奏請廢太  
子立見濟爲太子疏曰 太祖百戰艱難取天下  
期傳之萬世往年 上皇輕身禦虜文武將吏十  
喪八九駕陷虜庭寇至都門幾喪社稷不有皇上  
臣民何歸今且踰二年皇儲未建臣惟人心易搖

多言難定爭奪一萌禍亂不息 皇上卽循遜讓之美復全天叙之倫恐事機叵測反覆靡常語曰天與不取反受其咎近日仰觀天象土星逆行入太微垣與諸災變皆可畏愕願早留意萬一羽翼長養勢權轉移委愛子於他人寄空名於大寶階除之下變爲寇讐肘腋之間自相殘處此時悔之晚矣乞與親信文武大臣密定大計以一中外之心絕覬覦之望疏入 景帝大喜曰萬里外有此忠臣亟下廷臣會議且令釋玠罪陞都督是月乙酉禮部尚書胡濙侍郎薛琦鄒幹集文武羣臣廷

議衆相顧莫敢發遲疑久之司禮太監興安厲聲曰此事不可已卽以爲不可者勿署名無得首鼠持兩端羣臣皆唯唯署議於是濙等暨魏國公徐承宗寧陽侯陳懋安遠侯柳溥武清侯石亨成安侯郭晟定西侯蔣琬駙馬都尉薛桓襄城伯李瑾武進伯朱瑛平鄉伯陳輔安鄉伯張寧都督孫鏜張輓劉深張通郭瑛劉鑑張義錦衣衛指揮同知畢旺曹敬指揮僉事林福尚書王直陳循高穀何文淵金濂于謙俞士悅左都御史王文王翺楊善侍郎江淵俞山項文曜劉中敷沈翼蕭鎡王一寧

李賢周瑄趙榮張敏通政使李錫通政樂憚王復  
叅議馮貫卿蕭維禎許彬蔣守約齊整李賓少卿  
張固習嘉言李宗周蔚能陳誠黃仕儁張翔齊政  
寺丞李茂李希安柴望鄺鏞 詢王溢翰林學士  
尚輅六科都給事中李讚李侃李春蘇霖林聰張  
文質十三道御史王震朱英涂謙丁泰亨強宏劉  
琚陸厚原傑嚴樞沈義楊瑄王驥左鼎上言父有  
天下必傳於子陛下膺天明命中興邦家統緒之  
傳宜歸聖子黃珖奏是制曰可朕上請 聖母上  
聖皇太后太后言予老矣願宗社安天下得太平

人心既如此不可拂朕敬承慈命禮部具儀擇日  
以闕即日簡置東宮官懋亨澐直四人太子太師  
溥循毅謙四人太子太傅輓文淵濂南京禮部尚  
書儀銘士悅工部尚書兼大理卿石璞都御史溢  
文翔九人太子太保淵一寧滋三人太子少師山  
太子少傅錫維禎兵部左侍郎俞綱都御史羅通  
四人太子少保輅兵部左侍郎兼左春坊大學士  
中敷太子賓客嘉言詹事文曜琦少詹事榦左庶  
子侍讀彭時侍講劉儼左右春坊大學士周旋趙  
恢左右庶子脩撰林文侍講徐理左右諭德修撰

李紹侍講劉定之司經局洗馬侍講楊鼎倪謙呂  
原修撰柯潛左右中允李侃御史魏齡詹事丞編  
修周洪謨劉俊檢討錢溥編修岳正左右贊善編  
修周安李泰林聰典籍鄒循左右司直郎侍書陳  
穀徐佖監丞鮑相縣丞高誠左右清紀郎檢討曾  
暹傅宗五經博士陸藝典籍李鑑左右司諫編修  
王僎校書中書舍人劉鉞趙昂正字教諭劉潔錄  
事序班楊欽王政周寧傳榮通事舍人凡東宮公  
孤皆支二俸五月甲午立見濟爲皇太子廢汪皇  
后立見濟母杭妃爲皇后詔曰天佑下民作之君

實遺安於四海父有天下傳之子斯本固於萬年  
大赦天下先是一日陳儀仗奉天門有男子執赤  
挺直入擊香亭奮呼曰先打東方甲乙木諸內使  
急縛男子詔付錦衣獄瘦死乙未以東宮令大賞  
文武官吏軍士丙申禮部言太子冲年百官朝朔  
望丁未柳溥于謙克正副使持節更封太子爲沂  
王癸丑以立太子故賞諸親王公主乙卯賞邊鎮  
文武內外羣臣又加賞內閣陳循高穀學士江淵  
王一寧蕭鎡商輅各黃金五十兩六月以后兄杭  
聚爲錦衣正千戶四年二月乙未太子冠命胡濙

持節掌冠高穀贊冠蕭鎡宣戒勅甲辰冠沂王及其弟榮王命陳循于謙持節掌冠何文淵儀銘贊冠商輅宣戒勅十一月以御史張鵬言簡東宮師傳講讀官上命胡濙王直陳循高穀王文儀銘江淵蕭鎡俞山俞綱商輅日更番侍班彭時日專講書李侃李齡錢溥劉吉日專侍讀書王謙趙昂更日侍書越四日太子薨謚懷獻葬西山天順元年降稱懷獻世子

悼恭太子

悼恭太子祐極 憲宗長子成化七年十一月已

酉立爲皇太子是年十二月上旬彗星見東方未幾皇太子卒葬西山

岐王

岐王祐 封德安弘治中請迎母養不許許諸王有子別居者得迎養其母母有子多亦從一子無子者移別宮著爲令王卒謚惠妃王氏葬西山國除

益王

益王祐檣封江西建昌母張德妃德妃生王及衡王汝王茂陵諸王皆歲祿本色萬石弘治中進馬

嘉靖十五年奸人班明誣昌國公通王有逆謀得  
白十八年卒謚四子長厚燁正德四年封世子  
今嗣王第崇仁王厚炫金溪王厚煌玉山王厚燠  
凡三王嘉靖初廷臣請以崇仁王後睿宗嗣興  
王不許厚炫五子載增封長子次載環載堦載堦  
載壤厚煌一子載學載增一子未名

### 衡王

衡王祐禛成化二十三年封青州卒謚恭子厚燿  
初封江華王嘉靖十年卒封世子十八年嗣王有  
賢行

### 雍王

雍王祐封衡州弘治四年之國十一年邸震壞  
正德二年卒謚靖妃吳氏葬西山國除孝惠邵  
太后三子睿宗及岐雍二王也

### 壽王

壽王祐楛封保寧改常德嘉靖年卒謚無  
子國除壽王有兄八皇子未封卒

### 汝王

汝王祐棹封衛輝弘治十四年之國正德十五年  
王以婚故請預支食鹽十年年三百引上曰王

同姓諸王傳 卷三  
以婚禮請宜別給長蘆鹽二千引食鹽如故嘉靖  
十八年車駕南巡王迓於途甚恭 上喜加祿歲  
五百石賜金幣

涇王

涇王祐樛母楊恭妃弘治四年封十五年之國沂  
州卒謚簡妃曹氏子厚烜嗣病辭祿不許未幾卒  
謚無子國除葬西山長史沈爌以王卒故改南  
京鴻臚少卿

榮王

榮王祐樞母潘端妃弘治四年封常德正德初留  
京邸劉瑾惡王與吏部尚書張綏謀逐王就國王  
嘗爲諸子請得食鹽菜戶嘉靖四年請沅江西港  
天心團坪淶池河泊稅八年盡取諸稅供王祿十  
八年卒謚莊六子長厚勲正德中封世子嘉靖十  
一年卒謚懷穆子載瑾嘉靖十八年封世孫嗣贈  
其父榮懷王

申王

申王祐楷涇王同母弟也成化二十三年生生五  
年而封封十一年而冊妃項氏又明年而卒謚懿  
葬京西蘭山無子國除王邸建於四川叙州未之

國嘉靖中弼郎僅得銀萬兩

蔚王

蔚王厚 孝宗第三子母 孝康皇后早夭謚悼  
葬西山

岳王

岳王 睿宗長子母 慈孝皇太后弘治十三年  
六月生生五日而卒嘉靖初贈岳王謚懷墓在承  
天 睿宗子女五長岳王次長寧長公主生四歲  
卒次善化長公主十歲卒初皆封郡主嘉靖初贈  
長公主又次鄔公主又次謝公主皆婚而卒駙馬

都尉鄔景和謫居蘇州謝詔掌宗人府事二十九  
年四月賜岳王名厚熙

靖江王

靖江王守謙 太祖長兄南昌王之孫也南昌王  
從祀廟庭子文正少孤其母王氏守節撫文正依  
太祖太祖愛之比長涉傳記有才略從渡江克太  
平破陳也先取建康擢樞密院同僉辛丑改院爲  
大都督府文正爲大都督節制中外諸軍事尋統  
元帥趙德勝等鎮守南昌號令明肅癸卯四月陳  
友諒圍南昌用雲梯攻具百道進擊文正主畫軍

中隨方應敵剪獲甚衆友諒獲吉安守將劉齊朱叔華臨江同知趙天祐狗城下文正不爲動至六月援兵不至文正遣千戶張子明告急建康敵攻城益急文正遣捨命王詣友諒營詐約降友諒緩攻及期城上旗幟一新至暮不出友諒縛捨命王城下殺之子明從水關潛出夜行晝止半月始達建康 上問友諒兵若何對曰彼兵雖盛戰鬪死者亦不少今江水日涸賊巨艦將不利又師久乏糧若援兵至必可破 上謂子明汝歸語文正堅守一月吾當自取之子明還至湖口被執友諒使

呼文正出降子明陽許之至城下呼曰大軍旦夕至諸君宜固守以待友諒殺子明文正守益堅七月 上統舟師二十萬來援友諒始解圍逆戰鄱陽湖竟敗死禁江口甲辰文正遣部將何文輝等討平江西未附州縣吳元年春江西按察使李飲水言文正驕僭不遜有怨言 上詰責大懼謀叛降張士誠 上大驚曰噫此子不才至此非吾自行不可卽日登舟至南昌泊城下召文正文正倉卒出謁 上泣曰汝何爲輒起此意遂載與俱歸群臣劾請伏法 上曰吾兄惟此兒免文正官安

置桐城召其子鐵柱語之曰兒無恐爾父違訓教  
忘艱難恣兇狡貽我憂我育汝汝長且封汝我終  
不以汝父故廢汝未幾文正卒洪武三年封鐵柱  
靖江王改名煒又改名守謙國於桂林桂林獨秀  
山前有元順帝潛邸改爲王宮未幾以淫虐廢爲  
庶人使田鳳陽閱七年復其王使居雲南賜璽書  
戒諭比至雲南益貪暴召還安置鳳陽又橫恣不  
法召至京撻而錮之二十五年卒子贊儀尚幼  
上憐宗室諸王皆無後命爲世子留京師贊儀  
慎好學能書洪武三十年春遣省晉燕周

湘代蕭遼慶谷秦諸王先自楚湘入蜀歷陝西出  
河南上山西抵大同宣府北平東至大寧遼東轉  
於山東擇文武忠厚之士以從以贊儀年幼欲其  
知親親之義且令涉山川險易也永樂中遣之國  
卒謚悼僖子佐敬嗣卒謚莊簡子相承嗣卒謚悼  
順子規嗣卒謚昭和子約麒嗣卒謚子經  
扶嗣卒謚安肅子邦寧嘉靖六年嗣先是靖江府  
食鹽歲給銀廣東至桂林市鹽至是乞支本色不  
許又乞桂林府稅銀亦不許

皇明同姓諸王傳第三卷終

子履準校

孫心材重校

附孔氏世家

海鹽鄭曉

孔克堅字璟夫先師五十五世孫也性敏學博善  
詩詞尤精樂府至正元年襲封衍聖公至正八年  
賜銀章攝太常卿治書侍御史山東廉訪使集賢  
直學士禮部尚書西臺侍御史國子祭酒世亂不  
樂居朝謝病歸復起力辭二十六年 太祖手詔  
趣入朝待以賓禮不名不煩以政郊社致膳歲致  
祿洪武元年 上召見面諭守先訓又曰爾有福  
快活人也洪武三年以疾告遣中使日再存問疾

篤詔乘傳還賜白金雜綵行至邳新安驛卒子九人皆有行誼長希學字士行至正五年襲封衍聖公洪武元年朝京師上問歷代治理條對甚悉上喜賜雜綵卽命還守祖庭是年十二月授資善大夫襲封衍聖公賜屬官管勾典籍司樂各一人希學歲入朝賜與稠疊元旦之朝特命班亞上相祖庭兵後廊廡圯壞祭田荒蕪官賦煩迫希學條請復故又請備禮器樂器樂舞儀式希學子訥字言伯篤學恭謹能詩書工篆法律身嚴恪始終不渝洪武十六年外艱以中官崩赴京祭于孝

陵竣事入見上顧謂廷臣曰孔訥真聖人子孫也館于太學遣尚書劉仲質勞問日繼庖廩復賜衣服鈔錠充物館舍十七年正月朝京師襲封衍聖公命禮官以大樂導至太學明日入謝復賜襲衣宴禮部吏部擬誥用資善大夫階上曰旣爵公勿事散官但誥以織文玉軸爲異耳遂著爲令每歲入覲得給符乘傳班序文臣首子公鑑字昭文生而岐嶷長益端謹建文二年二十一襲封衍聖公嗜學尤篤四年卒成祖初卽位遣使諭祭子彥縉字朝紳名字皆仁宗所命蚤孤母胡

夫人教育之永樂八年襲封衍聖公 上觀其言  
動進退從容喜謂侍臣曰真聖人裔也館之太學  
歸讀祖書不懈洪熙元年賜第東安門北景泰二  
年 上幸太學特召率三氏子孫觀禮賜冠帶錦  
衣越三年朝會賜三臺銀印玉帶麒麟服子承慶  
年六歲遭母夏夫人喪奉父及繼母盡孝既長從  
三氏學錄族祖孔克宴學所著有禮庭吟藁行于  
世未襲爵而卒景泰六年贈襲封衍聖公子二人  
弘緒弘泰弘緒字以敬早失怙年八歲 景皇召  
見賜冠服於東角門景泰六年襲封衍聖公賜玉

帶以軀小去二銜授之俾藏焉又賜金謹禮崇德  
圖書勅族人共保護之 英宗復昨入朝召見便

殿 上握其手置膝上與語久之以賜第湫隘改  
賜大宅弘緒嘗奏給三氏教授印開生員歲貢格  
蠲孔氏田租十七成化六年坐事削爵廷議世嫡  
相傳古今通義請如宋若蒙若虛故事命其弟弘  
泰襲封後仍歸其子弘治十一年巡按御史上言  
弘緒改過乞復爵 上與冠服家居弘泰字以和  
成化六年襲封衍聖公弘泰美風儀善論議每許  
騰人曲直料事當成敗多奇中 憲宗見弘泰束

孫氏世家 附  
玉帶遣人問曰二品焉得玉帶束乎對曰臣家門  
故事累朝恩數不敢廢也十三年加廟祭禮樂率  
族人奉表入謝弘泰嗣公三十有四年而卒弘緒  
子聞韶字知德弘治十六年襲封衍聖公未幾而  
其父弘緒卒孔氏又有世曲阜知縣三氏學錄洪  
武八年始以克伸爲曲阜知縣宣德七年始以克  
晏爲三氏學錄克伸克晏皆五十五世孫也又有  
諤字貞伯者永樂中舉人歷官左中允遷大理左  
評事又爲監察御史陞河南按察僉事有學行公  
恂字宗文穎敏絕人能詩善書天順丁丑進士給

事中禮科癸未陞少詹事 茂陵初以訊獄知法  
比陞大理左少卿尋復少詹事兼左諭德成化二  
年言事出爲漢陽知府適外艱六年復少詹事出  
南京卒公恂孝友善事繼母動遵禮度

附孔氏世家

子履準校

孫心材重校

附異姓三王傳

海鹽鄭曉

揚王

揚王陳公也建國之初 上念 淳皇后母家贈  
后父陳公為揚王母揚王夫人立祠太廟東歲遣  
大臣祀洪武三年中都守臣上言伏惟 皇上肇  
紀開天功德殷茂隆周恩於甥舅陋漢禮於靈文  
眷惟陳氏本乏胤宗更迷玄窆軫心揮涕日夕靡  
遑臣等旁詢父老徧歷村墟得陳公葬地在下縣  
盱眙風氣包疑天地之藏如故樵蘇絡繹樊衛之

禁甚踈宜崇華表兼建 廟祠臣又聞諸人言公  
本維揚尺籍當宋祚將傾扈蹕南遜師住海島將  
殞君崩士卒死溺莫可數計公舟破中濤脫死登  
岸招携瘡殘匍匐沙嶼累石支釜調糜苟活已而  
食盡自分天亡旁有死馬衆欲烹食曰我等餓且  
死食死馬肉亦死死等食馬肉死死得爲飽鬼公  
夢白衣人謂公勿食馬肉吾舟挈汝恍惚未信俄  
夢如初是夜未央櫓聲入耳若寤若寐復有紫衣  
人杖觸公腩曰舟且至奈何不起公驚立熟視身  
在艤中食頃颶發舟如輪轉公夙諳巫呪叩齒揮

神須臾風濤靖恬檣柁寧捷舉皆謝公共進酒食  
比至通州復饋巨魚歸於故里厭棄弓矢假藉符  
術避地盱眙津里鎮久之始生二女季卽 淳皇  
后也作配 仁祖誕育 聖躬公卒年九十有九  
臣等無任嗟異伏惟宋元之交華綱塗地戎貫滔  
天神胄攸鍾乾靈未殞 淳皇后之有父乃 皇  
上之有母也豈偶然之故哉臣等昧死奏 上曰  
朕固聞之立命中書省爲朕外王父揚王廟盱眙  
墓次置灑掃戶三家設祠祭署有司歲仲春秋祀  
召儒臣宋濂爲文神道碑

徐王

徐王馬公 高皇后父也洪武四年六月丙申

上坐皇宮門召禮部尚書陶凱諭曰 皇后德懋  
塗辛功高任奴佐朕布衣永清寰海寔惟慶宗發  
此靈胤惟后父馬翁世籍宿州鄉聯閔子少力耕  
農邠勤魏儉長負膂力虎視鷹揚疾惡如讐拊順  
如狎墟中敬憚莫敢頡頏元末使氣殺人藏命定  
遠已而江淮繹騷間并飢困避地轉徙蓄器俟時  
謀諸室人鄭媪乃以愛女託諸好友郭子興子興  
定遠豪俠首難稱雄衆推元帥收召民兵朕遣歸

麾部積著勲庸子興顧朕喜曰行且爲汝擇配又  
曰莫如吾女乃館朕甥廬荐成嘉禮又曰吾女馬  
公季女也惟吾夫婦愛如已女昔本嗣徽祥由天  
定朕時敬諾周旋有年旣登大寶遂正軒龍褒贈  
翁爲徐王媪徐王夫人物色嗣昆並遭闕天朕悲  
悼益深情文未備立廟太廟之東歲時奉祀顧族  
類有別典禮無稽姑卽王塋闢地作廟奉安神靈  
歲仲春秋俾有司祇供祀事汝凱宗伯典司人鬼  
其次第朕言刻石凱再拜頓首受命設宿州祠祭  
署以王鄰家武氏世爲奉祠守王墳灑掃戶九十

家

滁陽王

滁陽王郭子興其先曹州人父贅定遠生子興子興兄弟三人富有力豪淮西元末妖人起子興悉散家財陰結俠客死士友人馬公有季女日者言此女當大貴馬公以屬子興子興妻張夫人極撫愛馬公女壬辰汝穎亂子興召諸所結賓客子弟逐官吏與孫德崖等稱元帥據濠梁時上欲起兵往依子興仗劍走濠梁濠梁人欲殺上子興一見驚曰非常人也留麾下時時召與語益大異

上居數月謂上曰吾爲若婚小張夫人亦曰此異人也勿使爲他人用遂以馬公女妻上孝慈皇后是也子興勇悍善戰一時四帥孫德崖輩皆坐子興上子興剛直不肯下四帥四帥臨事木強不能出一語子興爲決通敏中節四帥固忌子興子興又出非語數侵四帥者會客兵彭早住趙君用駐濠稱王四帥挾二王縛子興下獄欲殺子興上方練兵於外聞變馳入子興家集諸健銳欲且篡子興不濟卽殺四帥去子興以故得釋歸故里稍收散卒得三千人二王又挾子興屯泗州

時 上在滁陽獨堅守不從子興去輒賂二王左  
右子興又得歸滁陽 上初移兵和陽有讒 上  
於子興者子興忽至和陽奪 上兵子興遂卒子  
興子四人長二子忌 上英武得衆心兵勢日盛  
爲毒酒召 上家人洩語 上上見二子果來召  
大喜並馬行去至半途 上忽躍起跪馬上仰天  
若聽語言已又頓首伏馬上頃之勒馬罵二子豎  
奴乃欲毒我耶二子曰安有是 上曰適天神云  
云二子駭汗洽背下馬伏地曰安敢有是 上竟  
馳馬歸自是不復至子興所遂積嫌隙二子者竟

不知所終或曰大舍二舍三舍皆戰歿或曰沉諸  
和州江中季子老舍洪武元年贈子興滁陽王建  
廟祠以王鄰家宥氏世爲奉祠守王墳已而復老  
舍家洪武十六年十一月 太祖面諭太常丞張  
來儀爲子興廟碑碑言王無後二十八年 太祖  
令旗手衛官李忠召老舍於黑窰殿入四川候蜀  
王蜀王母子興女所謂郭惠妃也老舍生謙謙生  
昇昇生信信生琥世以王孫朝京師琥乞恩弘治  
十五年得爲奉祀琥請乞不休正德中奪官  
論曰國制異姓不得王三王者皆贈王也又無後

異姓三傳

附

五

卽有之文獻不相佐不得沾斗食



